



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 3

Yoon bhukumer tem South Korea court kati nungboka ai

Külemisa tajungba : Eric Garcetti-i India nung amongba bilemteter

VOL. XXII ISSUE NO. 96 (ADOK 96)

DIMAPUR

TENTONÜ (MONDAY)

AENJETI (JANUARY) 20, 2025

₹ 5.00

NFHRCC aser Phom People's Council-i metetdaksür

Dimapur, January 19, 2025 (TYO): NFHRCC aser Dimapur Phom Union Predident-i anir Phom People's Council teshimtet nübotem külem senden ka menogo.

Dimapur nung amenba senden nung SASCI kübok foothills road yangluba onük benoka lemsatop aser January 16, 2025 nü Ao Senden, Lotha Hoho aser Sumi Hoho ajanga lemtetba kübok bangzüng kar renema ayu.

2013 nung bangzünga ayuba ama foothills road yangluba atema kioja/kidong/yimtsung shinga nem-a temenok magütsüsü. Iba telatetba anema inyakertem dak Phom People's Council aser NFHRCC-i tapet mapa inyaktsü ta tanü parnoki bangjemtep.

SASCI kübok Foothills Road

yangluba Contractors/Firms ajaki iba sangdong agütsüba sülen anogo asem tsüngda Implementation agreements nung sign asütsüla. Ibaji January 23, 2025 tashi lir aser sign masürtem Phom Council telongtet kübok mapa meinyakdaksütsü.

January 23, 2025 matongdang implementation agreement nung sign masürtem asoshi Phom Council-i Committee den külemi Department dang work order agientsü aser tangar nem mapa inyakdaksütsü rongshitsü ta senden nungsa lemtet.

Mapa inyaktsüba mongpu süitemer anungji tesasatsü mapang ajurura bangdak firm/ Contractor-i iba tebilemtsü khuret abentsü ta parnokisa metetdaksütsü.

Rahul Gandhi-i 'white T-shirt movement' tenzüker

New Delhi, January 19, 2025 (Agencies): Lok Sabha nung Leader of Opposition Rahul Gandhi-i Deobarnü 'white T-shirt movement' ka tenzükogo.

Narendra Modi'er sorkari shishilembar kar shimteta takar kümdaktsür aser iba ajanga rongsenketzüng nung meputep tuluba kümogo ta Rahul-i ashi.

Sorkari sensakertem atema mebilemtsür anungji iba movement nung 'working class' aser lanurtemi shilem agitsü mepishir ta paisa ashi.

Iba movement nung shilem aginürtemi <https://whitetshirt.in/> whitetshirt link nung click asütsü mesüra 9999812024 nung missed call ka agütsüsü akok ta Congress MP Rahul-i metetdaksüogo.

White T-shirt ya subotsü ka dang masü saka iba ajanga campaign len aniba tangatetba pungu- Aria bilemba, Telongjem, Tashiyim mamshiba, ajak kasa

aser ajak tejakleni aotsü maitsü sayur ta website nung shia lir.

Item tangatetba ajanga India nung küm 8000 tashi libaliroa aruba tanüla sayur, kechiyong India ya teputep aser temeyoktep nung ajemdaker yangertetba lir ta 'white T-shirt movement' website nungsa shia lir.

White T-shirt ajanga India longjemtsü aser Rahul Gandhi'er Bharat Jodo Yatra o Bharat Jodo Nyay Yatra tangatetba tushir ta parnokisa ashi.

India nung mezüngbuba prime minister aser Rahul Gandhi tebou Jawaharlal Nehru den 'Nehru jacket' sendaktepba ama Rahul Gandhi den white T-shirt ya sendaktepa lir aser iba jagi iba movement indang maitsü amshir asütsü akok.

June 2024 nung Rahul arishi küm 54 ajungdang pai white T-shirt ajanga ochishiba, akangalongba aser naloknara melii aliba sayur ta shia liasü.

COCOMI-i Kuki telungpurtem anema inyakdaksünür

Imphal, January 19, 2025 (Agencies): Coordinating Committee on Manipur Integrity (COCOMI)-i Deobarnü Indian Army dang Kuki telungpurtem anema mapa inyaktsü takhangba agütsüogo.

"Centre nung sorkari lemsar yimsü asütsü police kübok kin o kin telemsa nungi tajangzük agitsü meranger" ta COCOMI Co-ordinator Thokchom Somorendro-i ashi.

Centre sorkari teti Kuki telungpurtem den sendakteptsü meranger aser külen Manipur nung tanga armed movements azüoker ta pai ashi.

Sorkar den indangindanga merarar den Suspension of Operations (SoO) agreement agitepba ajanga Centre-i Manipur

nung tebilemba tamajung kar yur inyakshangshiba sayur ta Somorendro-isa ashi.

Centre sorkar den Kuki telungpur telok 25 tashi SoO kübok lir.

Poppy lu ayimba aser drugs shibelenba den sendaktepa Kuki nung nem administration balaka agütsü nung koda ta osangbener kati asüngdangdang "iba ya Manipur ya pei sasa yimsü asüba state ka masü saka atsünga agiba alinük ka ta asüba ajanga tebilemtsü adoker" ta Somorendro-i langzü.

Manipur nung tang ajurua aliba tebilemtsü koktettsü atema mitkaitemi tamasa Kuki telungpurtem anema mapa inyaktsü nungdaker ta COCOMI lennirisa ashi.

Israel-Hamas ceasefire: Hamas-i Israel nunger 3 chiokogo



New Delhi, January 19, 2025 (Agencies): Israel aser Hamas tsüngda ceasefire tenangzüktep mezüngbuba shilem nung Hamas-i Israeli nunger asem chiokogo.

Hamas-i tetsür asem- Romi Gonen, Emily Damari, aser Doron Steinbrecher nunger chiokogo.

Ceasefire tenzüksü latetba mapang ghonda asem jungnüa süir külen tanep 11:15 ako (Gaza time) nungi Gaza time tenzüka liasü.

Ceasefire tenzüksü ghonda ka lia Israeli Prime Minister Benjamin Netanyahu-i Hamas ajanga mezüngbuba shilem nung chioktsüpurtem tenün mashii tashi Gaza nung ceasefire malitsü ta amokmerena liasü.

Hamas-i ceasefire tenangzüktep mezüngbuba shilem tenzüksü renema lir saka "technical and field reasons" ajanga menur ta telangzüba agütsü.

Tanep ceasefire metenzükdang Israel-i maneni Gaza kübok tesem balala amak aser idangji nisung 8 asü aser 25 yirua liasü.

Mitkartemi Gaza maneni amaker aser Hamas-i tenangzüktep raksara raratsü renema lir ta Israeli Army spokesperson-i ashi.

Deobarnep IDF forces-i Egypt aser Gaza tsüngda arrtsülen Gaza kübok Rafah toktsür Philadelphi corridor leni ao.

United States, Qatar aser Egypt ajanga ita 15 rara anendaktsüsü atema shilem asem lemsar ceasefire agreement mulungtepba nung IDF forces anientsüba dena lir.

Iba rara nung Palestine nunger 47,000 jungnüa tepsetogo ta Gaza health ministry-i metetdaksü.

Iba ceasefire tenangzüktep ajanga Gaza rara anentsü asoshi teyari agütsüsü. October 7, 2023 nü Hamas-i Israel amakdang nisung 1,200 jungnüa tepset aser iba tayang küpzüka Israel-i Gaza auyi kümdaktsüogo aser Palestine nunger 47,000 jungnüa tepsetogo.

Iba rara ajanga Middle East nung Israel aser tsükchir Iran tsüngda mepetmesü adok. Iran-i Hamas aser Hezbollah ama tanga

anti-Israeli aser anti-American paramilitary forces yarir.

Qatar, United States aser Egypt ajanga tiyongtsü nung ita aika jembia aruba sülen ceasefire tenangzüktep agiogo aser iba ya Donald Trump-i US president inyaktsü tezüngzüktep agitsü anogo ka lia tenzükogo.

Ceasefire mezüngbuba shilem ya hopta 6 atema lir aser iba mapang tsüngda Hamas-i pua aliba nisung 98 nungi 33 chioktsü. Iba nung tanurtem, arishi küm 50 ser tema teburtem, shirangertem aser yirua alirtem adentsü.

Külen, kasa mapang nung Israel-ia Palestine nunger 2,000 jungnüa tepuokdak balala nungi chioktsü.

Deobarnü Hamas-i Red Cross ajanga tetsür asem chiokogo. Par asem melena Israeli jails nung aliba Palestine nunger 30 chioktsü.

Iba ceasefire tenangzüktep kübok Hamas-i International Committee of the Red Cross (ICRC) dang Gaza nung meeting point osang sangoktsüsü aser ICRC-i iba tesem jagi oa nisungtem anizüksü.

U.S. President-elect Donald Trump-i tanü tezüngzüktep agitsü

New Delhi, January 19, 2025 (Agencies): January 20, 2025 anüngdang (India nungbo aonung 10.30 ako) Donald J. Trump-i United States nung kümsük tanabenbuba atema President inyaktsü tezüngzüktep agitsü.

Iba sentong ya United States Capitol Rotunda telong nung agitsü kechiyong iba anogo -11C tashi temekong asütsü ta asadangteta lir.

Donald Trump-i US nung 47 buba Tir inyaktsü aser küm 230 tema American democracy ketdangüsü arudang President kati re-election nung tamakok anguba sülen White House-i tanaben aruba President tanabubaji Donald Trump lir.

US President putiotsü nung Grover Cleveland-i 1880s nung 22

buba President aser 1890s nung 24 buba President inyaka liasü.

1933 küm US Constitution yanglushiba sülen küm pezü shia US President tezüngzüktep agiba sentongji January 20 nung agitsü aser iba anogo Deobar amshir January 21 nü agitsü ta lateta lir.

January 20 anüngdang President aser Vice President nem tezüngzüktep agidaktsür aser iba mapang matongdang aser agiba sülen sentong balala aika ayongzüka agir.

Iba sentong ya House aser Senate nungi küm pezü shia tentetba Joint Congressional Committee on Inaugural Ceremonies (JCCIC) kati achayanga agir. United States Secret Service-i security maparen ketdangüsü lemküka lir.

Iba sentong nung Democratic aser Republican party tem nungi lennir tejentem aser taoba US President tem adentsü imlar. Maneni, Elon Musk, Mark Zuckerberg, aser Jeff Bezos nunger adentsü.

"DC indoor 20,000-seat Capital One Arena nung tezüngzüktep agiba aser Presidential Parade sentong live reprangtsü asoshi lapoktsüsü. Ni tezüngzüktep agiba sülen Capital One nung sentepa alirtem den külemi adentsü" ta Trump-i Truth Social nung metetdaksüogo.

Asüng President Biden aser Vice President Kamala Harris asoshi formal farewell sentong ka agitsü aser iba sülen President's Room nung Signing Ceremony ka agitsü.

IIM Indore-i FDP asoshi Nagaland nungi tesayur aser research scholars sponsor asü



Nagaland nungi tesayur aser research scholars tem den IMM-Indore indang director aser professors tem tangokba noksa nung angur.

Kohima, Aenjeti/January 19 (TYO): Tawa Indian Institute of Management (IIM) Indore, Madhya Pradesh ajanga Nagaland University aser Kohima Science College Jotsoma nungi tesayur aser research scholars 21 atema Faculty Development Programme (FDP) ka sponsor süa liasü.

Iba sentong ya January 13-17, 2025 anogotem IIM Indore nung agia liasü.

IIM Indore indang institutional social responsibility nung shilem ka ama iba sentong ya ajanga world-class education angazükdakja shilem agirtem tesayuba aser leadership skills tajungba kumdahtsüsü maongka agütsü.

Iba sentong nung digital marketing, finance for non-finance executives amala onüktem nung rangloker agia liasü, koba Nagaland nungi educators tem nem senotsü tebilemsü khuret magütsü tashi agütsüshitsüsa yanglua liasü.

IIM Indore indang director Prof. Himanshu Rai-i ashiba agi, Nagaland academic community nem tashi balaka agütsütsü tangatetba nung IIM Indore ajanga küm shia Annual FDP atema Nagaland nungi shilem agirtem sponsor asütsü.

"Iba sentong yagi jenjang tajung academic aser leadership training agütsür, region nungi educators nem pei kakat reju

nung temelenshi tajung bener arutsütsü asoshi hadir aser resources agütsür," ta pai ashi.

Tarutsü nung IIM Indore nungi faculty züngsem tem Nagaland-i yoka specialized training sessions agütsü, ta pai metetdaksü.

Region balala lungjemtsü atema shisaliok ya hadir tashi tait ka lir aser lenir adokdakja temelenshi tasen bener arutsür, ta Prof. Rai-i ashi.

Iba sentong ya ajanga IIM Indore-i Nagaland nung aliba kakat reju tem den long-term partnership tashi tait yangertsü asoshi inyakba sayur.

Anogo pongu FDP nung shilem agir nem advanced teaching methods, leadership aser research inyakyim nung skills aser shisatsü agütsüsüsa yanglu.

Shilem agirtemi sensaksemba, real-world case studies amala nung teja amuoka shilem agia liasü.

IIM Indore ajanga iba ama sentong tajung ayongzükba atema Kohima Science College, Jotsoma indang principal Dr. Temjenwabang-ia pelaba lemsatop aser iba ya ajanga shilem agir aser par reju nung temelenshi tajung arutsü ta ashi.

IIM Indore ajanga Nagaland nung educational framework tashi itsütsü aser region nung academic community ajanga tayongzükba balala ajangetba nung yaritsü, ta pai ashi.

Prof. Tokatoli Achumi, Faculty, Kohima Science College Jotsoma ajanga IIM Indore nung ajangshiba tem lemsatop aser IIM Indore ajanga sponsor asüta FDP nung shilem agiba ya ni telemteta agiba tem rongnung tajungtiba liasü ta ashi.

Ki o jen tajung yangji angazükba ajanga kü nem tangatetba shisatsü balaka agütsü, ta pai ashi.

Nagaland University nungi research scholar Nzanthung Ezung-ia IIM Indore-i aoba nung ajangshiba tajung liasü ta ashi.

"Ni iba sentong nung tesayuba nung case studies inoka amshitsü aser shilem agirtem tiyong sür angazükba tajangzük angazük. Communication skills tajungba kumdahtsüba session tem jantratemsüka liasü," ta pai ashi.

Nagaland ama region nung academic framework akangshitsü asoshi iba amala sentong ya tongtipang lir, ya Prof. Rajhans Mishra, Programme Coordinator ajanga ashi.

Iba FDP ya Nagaland nungi academicians asoshi sponsor süa ayongzükba sentong ka lir aser ibai IIM Indore ajanga linük yangerba nung shilem agia region balala tsüngta shisaliok nung telemsa adoker aliba apu latsütsü mangdang nung lir.

Wokha nung NCC Annual Training Camp temogo



Dimapur, Aenjeti/January 19 (TYO): NCC Combined Annual Training Camp (CATC-138) sentong Assam Rifles Camp, Wokha nung January 18, 2025 nü tembangogo.

Iba camp nung district balala nungi cadets aser training staff ajak agi nisung 300 dena liasü.

Cadets tem asoshi anogo ter

mandatory training nungya anogoshi training yimya balala sayua liasü. Iba mapang cadets tem Physical Fitness Training, Marching. Weapon Training aser Live Firing amala sayua liasü. Iba den külemi kija aser telok lemsar tetoktepba balala agia liasü.

Cadets tem training company pezü nung lemsatsü,

kong Strong Man aser Strong Woman amala tetoktepba agi.

Kasa mapang cadets temi nüchiso asoshi raratem nem akhum agüja case studies agia liasü. Sharp shooting skills nung cadets pezü nem sempet agütsü aser tetoktepba balala nung tendanger Bhagat Company nem Champions Company sempet agüja liasü.

U.S. CONSUL DANG ASÜNGDANGER :

Q. U.S. nung khen alitsü asoshi onürtem atema January 1, 2025 nungi 'Nonimmigrant Visa Appointment' inyakyim tongtibang kar melenshiogo ta angazüker. Iba temelenshi koda melenshi aser kechiba ?



A. Nisung shia 'nonimmigrant visa' atema ajurutsü asoshi talangka matai appointment angutsü atema, onoki inyakyim kar melenshidagi. January 1, 2025 nungi application agüja alir shia nem anogo melenshitsü atema maongka khen dang agütsütsü. Anungji, visa application agüja alirtem shibasa Visa Application Center mesüra U.S.Embassy mesüra Consulates nung ajurutsüba anogo nung majuruteti süidaksüdir, parnok atemajibo ano khen visa application tasen asoshi fee agütsür külenang appointment tasensa meshitsüsa akümtsü.

Iba sentong melenshiba ya ajanga nisung shinga talangka matatsü aser ajurutsü aliba mapangtem junga amshitettsü nükjidong nung yanglua lir.

India nung U.S.Embassy aser Consulates nungi visa meshirtem ajak nem tajungtiba teyari agütsütsü onok terenemba lir. Iba temelenshi yagi nisung shia nem mapang lezmüksüba melamelaa ngutettsü, aser US-i onürtem asoshi mapang talangka matadaksütsü.

Iba inyakyim melenshiba indang tejangjaba metettsü atema, onok website nung ya repringangma : www.ustraveldocs.com.

Mejangjaba nisung tasü mang ka nguteta lir

Dimapur, Aenjeti/January 19 (TYO): Arishi küm 35 shi tain tebur mejangjaba nisung (non-Naga) ka Hotel Output anasa Super Market area nung tasü longdaka aliba January 17, 2025 nung ngutet. Iba osang angashir Dimapur Police temi nisung tasü mang aliba tesem tonga oa bushisüngdangba mapang pa anasa medical records tem ngutetba nung pa tenüng ya Gopal ta jangjatet.

Nisungba ya ayaba aser shirangba ajanga asü südi ta temulung melemteti lir.

Ozüng agi melaba maparen ajak tembanga inyakba sülen

tasü mang ya port-mortem examination/identification atema District Hospital Dimapur indang morgue nung bener oa yua lir.

Nisungba ya sentsü tanen jacket sentsü tanen, t-shirt sentsü pui-puir, long pant sentsü tanak aser slippers sentsü temesüng agir liasü aser tenütsü nung shi arba zübu tejen keta lir.

Kibur/kinunger/tembar temi Officer-in-charge, East Police Station, Dimapur den Mobile No. 7085055020 ajanga tongteprateptsü akok, ta Dimapur Police sangdong ka ajanga ashi.



It dangiterba osang tejangja kar dak ajemdaker Manipur police aser Assam Rifles temi Lilong Police Station, Thoubal District kübok Ushoipokpi tenemtsüng len telungpur indang camp tejen ka Honibarnep meita aoba mapang Single Bore Barrel (Sniper) ka, country-made rifle ka, Amogh Carbine magazine ka, .303 magazine asem, HE Hand Grenade ka, Detonator ka, 7.62 x 39mm live rounds pongu, .32 live round trok, 9mm live round ka, .303 empty case trok, 7.62mm (SLR) empty case pezü, 7.62 x 39mm empty case trok, Green Smoke 80MK1 ka, Stun Shell ana aser Tear Smoke Shells asem den TYT Radio sets asem den antenna, charger asem aser adaptor ka nguteta liasü.

Manipur nung küm 7 tsüngta gari lendong nung nisung 834 asü

Imphal, Aenjeti/January 19 (Agencies): Manipur nung tesüiba küm tenet tsüngta gari lendong 3,123 atalokba nung nisung 834 takum sama, ta Traffic Control Police Wing, Manipur Police Department ajanga ashi.

2024 küm state nung gari lendong 291 atalokba nung nisung 75 asü aser 600 yiru, ta police indang Road Crash Fatalities Report 2024 nung shia lir.

Iba ama lendong ya 2023 küm timba liasü, kong gari lendong 357 atalokba nungi nisung 103 asü aser 572 yiru.

2022 küm gari lendong 387 atalokba nung nisung 122 asü aser 698 yiru.

2021 küm gari lendong 374 atalokba police-i zülüoka lir aser yangji asür nisung 105 aser yirur nisung 435 liasü.

2020 küm gari lendong 433 atalokba nung nisung 125 asü aser 563 yiru.

Tesüiba küm 7 tsüngta lendong timtiba ya 2019 küm 678 ataloka nisung 164 asü aser 904 yirua liasü.

Tanabuba jenjang nung iba ama lendong ya 2018 küm 603 atalokba nung nisung 140 asü aser 764 yirua liasü.



January 19, 2025 nü New Delhi nung AAP lenir, Sanjay Singh aser Delhi Chief Minister, Atishi nati osangbenertem den jembidang tangokba noksa nung angur.

Delhi election nung candidate 719-i tokteptsü

New Delhi, January 19 (Agencies): Taruba ita Delhi assembly election nung menden 70 atema candidate ajak senteper 719-i tokteptsü aser candidate teimtibaji New Delhi menden nungi lir, ta Election Commission-i metetdaksü.

January 18 nü nomination papers ajak repranga liasü aser nominations karbo magizük.

Amongnü Election Commission-i, "Nominations 981 agüja liasü aser iba nungjagi 719 agizük. Nomination file asütsü atema tatembangbuba anogoji January 17 liasü aser January 18 nü nominations ajak reprangogo," ta metetdaksü.

Delhi assembly election atema mezüngbo nomination

1,040 agüja liasü saka iba nungjagi 477 magizük. Candidates teimtibaji New Delhi constituency nung parnok 23 lir. Ano candidates ishibaji Kasturba Nagar menden aser Patel Nagar menden na nung candidate pongungu dang lir, ta Election Commission-i metetdaksü.

New Delhi constituency nung nüngtugu candidates rongnung AAP tongti lenir Arvind Kejriwal, BJP candidate Pravesh Verma aser Congress candidate Sandeep Dikshit nung lir. Verma aser Dikshit naprongla ya taoba mapang MP tem lir.

Kalkaji constituency nung candidates 13-i tokteptsü, aser parnok rongnung AAP nungi Chief Minister Atishi, BJP

nungi Ramesh Bidhuri aser Congress nungi Alka Lamba nung densema lir. Candidate kari dangi election nung metoktepnüra January 20 tashi nung tenüng agentsü akok, iba sülen February 5 nü election atema tatembangbuba candidates list renemtsü.

Delhi election nung tongti party temji Aam Aadmi Party (AAP), Bharatiya Janata Party (BJP) aser Congress party tem lir.

2020 küm Delhi assembly elections nung AAP-i menden 62 nung takok angu aser tanüngba menden 8 nungji BJP-i takok ngua liasü.

Delhi nung vote agütsütsü temsüa alir 1,55,24,858 lir. Iba nungji tebur 83,49,645, tetsür 71,73,952 aser third-gender 1,261 lir.

Külemisa tajungba : Eric Garcetti-i India nung amongba bilemteter


Dimapur, Jan.19 (TYO) : "Ni asangur chanu asüba mapang, mezüng, Indiai arudang, kü mulungjang nung India indang komaka bilemtsüar memeteti liasü saka tang ni U.S. Ambassador mapa nungi anen dang, India-i kü dang sayuba mapatem agi kü mulungjang tepela agi sünga lir aser asenok asoshi dang masü saka alima asoshi asenok külemser yimjiyimjung tensa tajungba ka bener arutsütetsü ni imlar," ta US tir Joe Biden mapang India nung US Ambassador inyaksang Wb.Eric Garcetti-i metetdaksü.

"Ni India nung aliba mapang, India lima topur tajung sentsüwangshia alidak Mumbai yimti yimdong nungi India nung Sobaliba temulung Kolkata yimti tashi, ano külem Himalaya tenemtsüng aser Arunachal Pradesh nungi Kenyakumari tashi sema senzütsü maongka tulu nguogo, iba mapang India nungi kü taküm nung tagitsü aika angazükogo aser talisa United States aser India na ya külemisa tajungba ta angatetogo," ta paisa ashi.

"India den shishilembaba nung 200 billion dollar shi endoka inyakba agi US ya India den shishilembar kanga tongtibang ka kümogo aser alima kin ajak dang nungi India nungisa teimtiba kaketshir lakh asem tashi US nung oagi züngdagi aser küm ana tsüngda India nungi US nung khen atema oa alitsü asoshi temelega visa nisung lakh ter shi nem agütsüogo. Iba denji alima tzi möpong memenendaksütsü asoshi inyaksü atema sen billion 9.25 dollar agütsüba den shirangertem yaritsü asoshi tesem 90 tashi tajungba küma yanglutsüogo, iba jagi India nung nisung million 45 ajangzüksü imlar. Itemji külemi ser inyakba tesüngmangtsü mapatem, ajisüaka ano itemji dangbo masü," ta Eric Garcetti-isa ashi.

Paisa India nung US aser India na külemi inyakba mapatem technology nungi tenzüker shishilembaba, tetsürtem jenjang tajungba kümdaksüba, nisungtem anema lidaksütsü inyakba aser Indo-Pacific kümzüka ayutsü asoshi inyakbatem aser tziüm nungi anünglak tashi nung külem ser inyakba mapatemji pai bilemba dang nungibo kanga agia teimba liasü ta metetdaksü.

"Ni tamasa Ahmedabad yimti semdangba mapang tetsürtemi tentetba telok ka tenüng agi SEWA nung lenirtem ajurudang, alima nung tzi möpong mejungi akümba ajanga nisungtem timtem ajurubatem repranga anepalutsüba ya alima kintem asoshi kanga rongdak nungdak mapa ka lir ta tali tangatetba aküm," ta Eric Garcetti-isa meettaksü.



"Serum Institute, Pune nung India, US aser UK nung inyakertem longjemer yanglutetba ramen mozü khu abenba garitem nung oshir Central African Republic limai bener yoka anguba mapatem ni kodanga mamatsü," ta India nung US Ambassador Garcetti-isa ashi.

"SelectUSA Summit nung adentsü asoshi aoer India nung entrepreneur-tem den külemi maongka tajung agia oa denogo aser iba sentong ajanga US nung sen dollar billion 3.4 amshia mapa inyaksü renemba sentongtem nguogo aser U.S.-India na külem ser India nung tayimtsü senzüba mapatem tajungba kümdaksütsü asoshi US nungi sen dollar billion 150 jenjang tayimtsü alitsü aser Haryana nung tayimtsü anendak tuluka yanglutsü sentong renemogo," ta paisa ashi.

"India nung sobaliba senmangtem kümzüka ayutsü aser aser item otsütemji tajungba lemsatepa aotsü atema U.S.-India Cultural Property Agreement yanglutetba atema kanga pelaa bilemer. Iba denji ano U.S. nung cricket asaya jangradaksütsü atema 2023 küm Major League Cricket tenzükdaksüba ajanga 2028 ni alidak Los Angeles yimti nung Olympics asayadang cricket dena sayidaksütetsü," ta Garcetti-isa pelaba shisem.

"Kodang U.S aser India na longjemer külemi inyakdir, alima nung asenoki melapoktetsüsa kishi kata malitsü, asenok den tembar mesüner malitsü, kechiyong asenoki ajak ajungtsü atema inyaker," ta paisa ashi.

"Ano, külem ser alima yimjiyimjung asoshi maneni inyakdi. Ni India dang kanga pelar, ni asoshi India nung U.S. Ambassador inyakbaji maongka tuluka liasü, itemji kü mulungjang nung teti alitsü," ta Eric Garcetti-i pa India toktsür US-i meyipa maodang tepelaba o metetdaksü dang shisem.

Pa ya tang anentsü aliba U.S.tir Joe Biden mapang shim aser tang U.S. tir tasenba Donald Trump arur asünungji, pa anener aser pa melen Trump Administration-i Ambassador tasen ka shimer India-i yoktsü. Eric Garcetti ya yaküm küm Kohima tashi arua anogo ishika monga liasü.

Sorkari longkak aiter aluyimertem den senden amentsü



Sangrur (Punjab), January 19, 2025: Centre sorkari longkak aiter aluyimertem den senden amentsü sangdongba sülen aluyimertem lenir, Jagjit Singh Dallewal-i medical teyari agitsü melunga hospital ka nung medical teyari agidang tangokba noksa nung angur

New Delhi, January 19 (Agencies): January 19 nü Centre sorkari, February 14 nü Centre sorkari Chandigarh yimti nung Punjab nungi longkak aiter aluyimertem den senden mena aluyimertem takhangba ontüktem atema o lemteptsü, ta metetdaksü.

Iba sendenji amenba ajanga aluyimertemi longkak aitba anentsüa akok.

Aluyimertemi alu nungi züsentetbatem atema sorkar dang Minimum Support Price

(MSP) legal guarantee akhanger.

Sorkari aluyimertem den senden amentsü sangdongba sülen aluyimertem lenir, Jagjit Singh Dallewal-i medical teyari agitsü melunga liasü. Pai tesüba anogo 54 tashi lumia longkak aita arudar.

Joint Secretary Priya Ranjan leniba nung Union Agriculture Ministry nung ketdangsertem aser longkak aiter aluyimertem tsüngda senden amendang sorkari aluyimertem den senden amentsü nangzük.

Ranjan-i, February 14 nikongdang 5:00 ako nung Chandigarh nung aliba Mahatma Gandhi State Institute of Public Administration nung aluyimerem den senden amentsü, ta metetdaksü.

Paisa, Dallewal temang tamajungba akümba ajanga pa dang senden nung shilem agitetsü atema nai medical teyari agitsüla, ta mepishitsü asoshi telok ka yoka liasü, ta ashi.

"Onoki pa temang koma aliar metetpela aser longkak aiter aluyimer lenirtem den senden mena liasü," ta paisa metetdaksü.

Samyukta Kisan Morcha (Non-Political) aser Kisan Mazdoor Morcha (KMM) kübok Dallewal leniba nung aluyimertemi longkak aiter.

Dallewal-i medical teyari agitsü melungyonga sorkari MSP takhangba magizük tashi pai maneni lumia longkak aitsü, ta metetdaksüogo.

Amongnü nikongdang nungi Dallewal-i medical teyari agi tenzükgogo. February 14 nü ayongzükba senden nungji Centre sorkar aser Punjab state sorkar naprongla nungi ketdangsertem adentsü.



TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 20, 2025

Investors ya shirnok ?

'Investors' tetezü nisung shibai pei sen amshia tajangzük tajung angutsü asoshi mapa inyaker, pa mesüra laji Investor mesüra parnokji 'Investors'. Anungji, kodang asenoki tanga lima nungi Investors jaoka asen lima nunga asenok tajangzük angutsüsa mapa inyadaksütsüla ta jembidir, asenoki angatetsüba kaji, asenok ket nung asen lima nung akaba rongsentem tazü agi tamen küma yanglutsüsa sen maka, anungji asen den külem ser inyaksü atema tangar sen akar, takartem bushia parnok sen amshia asen lima nung asenok ajak ajangzüksüsa mapa inyadaksüner. Iba nükjidong nung Kohima nunga taoba mapang khen anaben kabo state government-i anepalua India tesem balala nungi Industry aser business inyadak tesem balala nungi kibur aser tongti ketdangsertem jaoka "Investors' Meet" aliba nguogo. Kasaji, Assam nunga taruba ita February 25 nungi 26 tashi Guwahati nung "Advantage Assam 2.0" ta ser sentong ka akatsü renema lir. Iba sentong nung alima kintem nungi investors arua tendaksütsü atema osang agüja Assam Industry Minister Bimal Borah London tashi oagi jajadagi. Pai London nung alir takartem dang ashibaji, tang ya Assam nung pei sen amshia business inyaksü mapang kanga tajung lir, kechiyong timtem agütsür mali aser state government-i electric power teperi agütsütsü aser tesem ajaklen lenmang tesadem tajung yangluja lir. Atangji, Assam ya asen kidanger, anungji Bimal Borah-i London nung oa tebanger dang ashiba o ji shitak shiogo ta asenokia shiteter. Iba amaji tangar mulung akoktsüsa pei lima tensa tia indang osang tajung bener oagi Nagaland nungia yimten lenirtemi bendang limatem sema oagi Nagaland indang shitet nungbo koda jungla. Alima nung ya pei kijai inyaktetsüba mapa aikabo mali, mapa ajak ya ajak kasasa ajangzüksüsa yaritepa inyaksüba mapatem dang lir. Ibayongji, asenoka tangar sen akar takartem jaoka tajangzük akaba mapa tulu inyaksü asoshi tesem tesem nung "Special Economic Zone" shimteta inyaksü nungdakba indang jembir. Ajisüaka, asenok tebang o aser mapa na mesütep, kechiyong tebang agibo Nagaland nung pei sen amshia mapa tulu inyaksü asoshi tensa tia ajungba indang company tapu balala nungi lenirtem jaoka jembir, saka handicraft oset terara yanglur ka dang tax meshiba dena menokdangteter aser tzü ayokertem dena tax meshiba agi yimdong nung sadema mejajateter. Aji oda, shishilemba dak aonsutsü ayoktsü temelaba agütsütsü state government dak tashi mali kümogo. Iba ama alima tensa tiaji dang masü saka tangar pei sen agi Nagaland nung asenok ajak ajangzüksü atema industry ka lapoka inyakdi asünung lenmang maka aser electric power-bo mali ta süra, shibaibo pei sen bener arua tajangzük angutsü asoshi asen lima nung inyaknüsü ? Investors ya angati temeim mapa inyakertem masü saka pei sen amshia tajangzük tulu angutsü asoshi business inyaksü purtem lir, anungji takoksa angutsü amai reprangtetra, shingai bendang lima nung pei sen amshia mapa metenzüksü. Ano külen, Kohima nung asenoki ayongba Investors senden ya state government-i Industry aser company balala nungi pei sen bener arua Nagaland nung mapa tapu balala tenzüka inyadaksütsü asoshi lenmang sayuteptsü atema jaokba masü saka Industry aser Company shia nungi parnokki aaba nungi nübortem asoshi angati mapa tajung inyaksütsü atema CSR (Corporae Social Responsibility) 2% ayuba sen meshir amai dang jembiba angashiogo. Iba jagi Naga nunger tokolok ilaba aser temulungjang majungba sayur. CSR senji government ajanga inyaksüba sen masü, aji Cooperate-temi mulungtet telok kar ajanga inyaksüa akok. Ano, government ajanga inyak nunga CSR senji business inyaksüba sen masü saka nübortem asoshi nungdak inyaksütsüba sen lir. Itemji meteta state government-ia aser asenokia Investors jaoktsü renemtsüla. Atangji, tamasa Foothill lenmang ama ya jungjung renemra aser electric Power peria kara, Investors shibaibo marunütsü, majayonga arudinie ta asüngdangtsü.

OLEMSABANG

ANAREP IMPUR

- Molungkimong Literature Board

(Yashi adok nungi...)

Nai Molungyimsen Arogo nungji matalokba aika bendena rongloka sangogo, iba mapang asen Ao lima kechi tia nung liasü, ibajiang mezüng. Molungyimsen 24th October 1876 nung akum, nai par nem temeden aika agütsünür, saka yim kumer küm pongu tsüngta nung kibong 8-i missionary dang miima 1880 küm Sü achiba par Arogo otsü nung zülua likaji koda? Nai Molungyimsen nungi dang mapa ajak inyak amai zülubaji Rev. Dr. E.W. Clark record nungbo 1895 tashi nung Arogo pongu dang angur (1) Dekahaimong (2) Molungyimsen (3) Yajang (4) Wamaken (5) Merangkong, iba mapang Ao lima nung tamanger 68 dang liasü. P. Renthly, nai Wokha tashi shiti bentepba Zülusemogo. Ibai 1886 nung Clark-i züluba shiti ya Molungkimong nungertemi bener Wokha jagi aoba akodi! Nungdak dang süra onoki tenüng dena agütsütsü. Ibai

Molungyimsen nunger temi inyakba masü, küm 1888 nung Mongsenyimti nung Lakhimpur Battalion sepoy arua amenok aser Mokokchung Division nung Army arua ali. Iba sülenang Ao lima nung Khristan yimsü ya ayim sünga prokshia ao. Rev. Dr. E.W. Clark-i yimsü bener jajaba ya yim tulu aika sema jajaogo. Pa Kor nung ayip-khu alenloker shiküp juli nung tzü aben aser prangbong ka bener yim balala sema jaja. Rev. Dr. E.W. Clark jajabaji chitem tema bener o meyiper anir jaja masü ako. Rev. Dr. E.W. Clark-i iba mapangji asenok dang nungi tajungba Ao oshi jembia liasü. Molungyimsen-i Tsüngrem o jembie ABAM maoba indang nai zülüogo. Kibur majep nung na kechi atema yamai asangshia ajeper? Molungyimsen Arogo Jubilee-ji 2026 nungang adongerakodi! Anogo agi madong benjongi jaok agi maoba alitsü. Ao mongdang alirtemya yar, suwar, lenimaor tem sentepa aliba ABAM tenzüker masüa ta metetang, parnoka Impurji müketa sentry yoa alitsüa akok-ako. Naisa shiogoto, ashir-auür Arogo nung atsünger alir Funeral service-ji Pastorbai magir ata! Molungyimsen arogoji iba amaji asüba agi Tsüngrem o jembir maoba alitsü nung koda. Mezüngbuba nung nai arogo otsüji grassroots level nungi angatetang aser dangar tejakji shidoktsütsü merangang. Lakseta jembiyongbo Molungyimsen arogoi anempong süngo alener Anki ashiba-ato. ABAMi nunga ta südakmonga alima obendang dak par temeden atema court nung case aguja lirji ibaji par sasa ABAM den Anki ashiba masü na?

Tang iba ama tensa ka nung nai ashitsübaji, ABAM kübok Lim Arogo telongjem ka tepong langer nokdaka lir, iba nungji denang, Aor yamai temangmangdaksü ta ashiang tajungba masü na? Laishiba anar lakseta tzülupanglu yongbo ABAMji akangakanga atsü agi atsüpanga lirko taji Lim Arogo 170 denji case-ji withdraw sür ajemalua denang ta shisa rajem tajung agütsü tajungba asütsü amai onokibo ajiteter. Alima nung shiruru tilaba tashi lokti senden lir, loktii kodanga kija mebushir, kijai dang lokti bushir. Anungji par dangji asen Arogo kija ali majunga ta shisa rajemjangma, ibajiang na atema takok asütsü masü na?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Merok mi ya Tsüngremer temerenshi asü masüar memetet: Franklin Graham

January 19, 2025: Tang Los Angeles nung merok mi lendong ajanga nisung aika asüba aser kiojen jenti rondokba ya Tsüngrem nungi temerenshi lir; iba ya Tsüngremi Hollywood nem temerenshi agütsüba lir, ta social media nung o entepba mapang nung sayutsüngir, Franklin Graham-i mi lendong ya Tsüngrem nungi temerenshi asü masüar ni memetet, ta ashi.

Franklin Graham-i aniba telok BGEA (Billy Graham Evangelistic Association) aser Samaritans' Purse nungi chaplains aser volunteer temi mi lendong agi takoksa angurtem yaridar.

Merok mi ajanga tang tashi nung nisung 23 süogo aser kiojen 12,000 dak tali rondokoko. Palisades nung mezüng mi poktetba sülen tang tashi nung ali acre 23,713 nung arem aser kiojen rondokoko. Tang tashi nung mi shilem 17 dak enseptetogo. Eaton nunga ali acre 14,117 nung kiojen rondokoko aser mi shilem 35 dang enseptetogo.

Osangbener den jembidang Franklin Graham-i, "Nisung aika pei akaba ajak samaogo. Nisung aikati iba ya kechiba? ta asüngdang. Iba telangzüba angutsüji kanga tasak," ta ashi.

Paisa, "Onoki parnok dang Tsüngrem temeim lemsatepner. Tsüngremi parnok anepalur aser metoktsü, ta shiner," ta metetdaksü.

"Taküm nung item ama

yipru balala ajangshir. Tangbo asenok ket nung TV aser social media lir; iPhone ajak nung video camera tajung lir, anungji küm 20 mesüra 40 tejaklen dang nungibo tanü putu nung ang asenoki tatalokba teimba angur," ta pai ashi.

"Atangji asenoki item ama taküm nung yipru aika ajurutsü. Lendong ajema makümtsü saka Khristan ka ama asenoki ajak nem 'Tsüngremi parnok meimer' ta angatetdaksütsüji kanga tongtibang. Tang ama taküm yipru lendong ajuruba ya Tsüngremer obendang masü, ta ni bilemer. Tsüngremi asenok meimer, ta asenoki metet," ta paisa ashi.

Osangbeneri Franklin Graham dang, merok mi lendong ya Tsüngremi Hollywood obendangba temaitsü asü?, ta asüngdangba langzüdang pai, "Ya Tsüngremi Hollywood obendanger asü? Ni memetet, ajisüaka masü südi ta ni bilemer," ta ashi.

Paisa, "Tasüngdangbaji ya asütsüla- asenoki Kibuba Yisu Khrista meteta ali asü? Pa matsüngdang nokdaksü atema asenok renema ali asü? Asen meyong ki arong aser süadok asü nunga asenok Pa matsüngdangi aotsü asü? Tsüngremi asenok agizüktsü asü? Asen menen alangzüktsü atema Kangki nung asüsang aser tasemnübuba nung shia arusang Kibuba Yisu Khrista tenüng nung asen menen nangzükba aser tamang agi Pa

dang tatok meshiba ajanga Pai asenok agizüktsü. Asenoki ibaji amangra, tamang agi agizükatetra aser asen melungjang nung Khrista agizükra Tsüngremi asen menen tai atoktsü. Onoki ibaji shiteter. Taküm nung yipru kechi ajurudir ajuruaka asenoki Tsüngrem matsüngdang nokdaksü asenok renema alitsüla," ta ashi.

Southern California kübok Los Angeles region nung merok mi ajanga nisung aika kongshir timtemba mapang nung Billy Graham Evangelistic Association (BGEA)-i chaplain aika yokogo.

BGEA indang Rapid Response Team nung international director, Josh Holland-i, lendong nungi jenshirtem aser takoksa angurtem jenoka aliba tesemtem nung chaplain temi sarasadem agütsüba den külemi counselling agütsü tenzükogo, ta metetdaksü.

Taoba hopta BGEA Tir aser CEO, Franklin Graham-i, "Nüburtemi pei otsü ashitsü nüngdak. Taküm nung lendong tulutiba ajuruba aser mi lendong nungi kümzükba kuli ashitsü nüngdak. Chaplain temi otsü dang angatsü aser parnok den külemi sarasadema parnok ajungmesotsü. Tsüngremi parnok mesendok aser anepalur ta ashitsü. Shisatsü aser tanela nung yariba ya kanga tongtibang ministry ka lir," ta metetdakja liasü.

ANOGO ABEN TSÜNGREM DEN OCHI TAKÜM

"Tsüngremji lung lir, pa mapa tabensa. Kechiyong pa anang ajak shitak, pa ochi aser tsüngchir lir. T. Kumen 32:4

Nisung asoshi ajak dang temelatiba saka tasaktibaji ochi shia alitsüba ya lir. Ochiji kechi? Shirnoki Yisu Khrista memetet parnoki ochji kodanga memetetsü. Kechiyong Yohan 14:6 nung, Yisui yamai ashir, "Lenmang atangji, Atangji tetezü shitak, ochi. Ochi ya temulung lemtetba, tamang katetba, tajung aser tamajung, shitak aser teyaz? bendanga metetba.

Ochi-i ajak nung alitsü akoker. Aji asünung ochiji ajaki jembiner, ajaki ochishir dang kümner, ajaki ochishia alitsü jangrar. Saka aiben ochiji samadaksür. Yimden yimsüsüba aser arogo menden, kibong aser kija taküm shia dak ochiji alitsüla. Nisung ka shiba dak ochi meli pa mes?ra laji tas? den saku anungji ochiba metetba taküm ka küma alitsü Tsüngrem O yagi sayur..

Rom 3:4 nung, "... Nisung shiaji teyazür liaka, Tsüngrembo ochi lir ta metetang. Zülua aliba ama, "Neo nung ochi ta metentsü asoshi, aser na obendangba nung takoker asütsü." Ochiji ya nisungi meranga bushiba, angazükba aser angashiba agia masü, saka Tsüngrem tanela aser pa tsübuba shisatsü kodang asenok dak lidir idangji asen takümü ochi taküm kümtet. Asenok tamangertemi ochi ya dang meima, ochi nung dang lira asenoki temenen tatidang aika nungi jembutetsü.

Khristan ka tasü mang aremtsü memela

January 19, 2025: Chhattisgarh state kübok Chhindawada yim dak pastor ka tasü mang aremtsü atema par jabaso nem temelaba magütsüba sülen jabasoi Supreme Court nem temepishiba ken o ka agüja liasü.

Iba ken o nung Supreme Court-i Chhattisgarh sorkar arürtsüba den külemi telangzüba agüjang, ta tuyuogo.

Khristan jagi, pai tebu tasü mang meremetet, kechiyong yimdaklirtemi ibaji ashishia liasü aser police-ia pa amokmerena liasü, ta metetdaksü.

Justices- B V Nagarathna aser Satish Chandra Sharma nati, Khristan ka tebuji yakta asü aser January 7 anogo nungi Jagdalpur nung aliba district hospital & medical college nung tang tashi tasü mangji yua lir, ta metetdaksü.

Supreme Court-i Chhattisgarh sorkar dang Khristan kati temepishiba ken o agüja aliba dak sendakba nung court nem telangzüba agüjang,

ta tuyuogo.

"Yim dak panchayat bo toktsür high court-ia mamangtetsüsa obendang agütsü. State sorkar kechi inyaker?" ta Supreme Court bench-i asüngdang.

Iba ken o ya maneni Hombarnü (January 20) angadangsü.

Mahra kin nungi Khristan, Ramesh Baghel-i Chhattisgarh High Court dang pa tebu aser pastor tasü mangji yim dak leper nung Khristantem nem lemsükja aliba tesem nung aremtsü temelaba agüjang, ta mepishia liasü, saka High Court-i pa temepishiba magizükba agi pai Supreme Court nung ken o benok.

Yim dak gram panchayat sarpanch-i, Khristantem tasü mang aremtsü atema temeja tesem lemsükba mali, ta kulikaket agütsüba agi high court-i tasü mang aremtsü temelaba magütsü.

Pastor ji kanga tambur liasü aser pa mapang talangka shiranger asü.

Pastor jabaso, Baghel-ibo, "Chhindawada yim dak gram panchayat-i tasü mang aremtsü mesüra rondoktsü atema tesem lemsükja lir. Yim dak aliba leper nung tribal nisungtem aremtsü, Hindu nunger tasü mang rondoktsü aser Khristantem tasü mang aremtsü atema tesem balala lemsükja lir," ta ashi.

Paisa, tasü mang aremtsü atema Khristantem nem lemsükja aliba tesem nungji pa tenü aser tebou nata rema lir, ta metetdaksü.

Pastor asüba sülen par kibongi asüpila sentong agia yim dak leper nung mang remnüa liasü, ajisüaka yimdaklirtemi ibaji ashishia parnok amokmeren.

Yim daklirtem jagisa tasü mangji pastor kibong nija li nunga aremtsü memelai liasü.

Yim daklirtemi Khristan kibong amokmerenba mapang nung police 30-35 shi yim dak tonga aru. Police-ia Khristan kibong dangji tasü mangji yim dak nungi bener orang ta tuyua liasü.

Phiro Baptist Arogo Centenary memorial quarter semzük



Dimapur, January 19 (TYO): Wokha district kübok Phiro village Baptist Arogo sangküm January ita nung küm 100 ajungba Centenary amongtsü.

Arogo Centenary nungtem nung Dimapur, Kohima aser Wokha district tem nung aliba Phiro yimer anükapangtemi Phiro Baptist Church anasa staff quarter ka süja January 19 nü Arogo nem agütsüogo.

Iba quarter asüba maparen ya yaküm March ita nungi tenzuka liasü aser November ita nung renem.

January 19 nü Phiro Baptist Arogo nung pastor, Rev. Thungjanshio-i meshiteta sarasademer semzüktsüogo. Iba sentong nungji Phiro Baptist Church nung tenzükertem aser Dimapur, Kohima aser Wokha nungi anükapang kibongtem densema liasü.

AO OSHI ANGAZÜKDAK:

TANÜ ANGAZÜKTSÜBA OJANG

Tebelem

(v) mapa inyakba agi ania akümba (tiredness)

* Nisung aikati tebelem marem alu mayimer.

Tebelemer

(n) mapa aniseta inyaker (tired labourer)

* Mapa nung tebelemer ajak nem süngo talila jemdaktsü.



OLONG PAITEP # 7040

Grid for OLONG PAITEP # 7040 with numbers 1-23 in a crossword pattern.

TIPLÉN

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatépba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaktsür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasatsüngdajatépba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7039 TELANGZÜBA

TIPLÉN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka,
6. Satan, 9. Putet, 10. Tembar,
11. Tatok, 12. Amang, 14. Jala.

NAI-A YA METETTER MA



Alima nung Digital Foreign Direct Investment Initiative (DFDII) mezüngbuba tenzükba linükji Pakistan lir. DFDII ya World Economic Forum (WEF) aser Digital Cooperation Organisation (DCO) ajanga tenzük aser Pakistan-i mezüng benshir ta Prime Minister Shehbaz Shari-i January 19, 2025 nü metetdaktsüogo.

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam nung hopta ka tsüngda 'rat hole mines' ajak shibangtsü



Dibrugarh, January 19, 2025

(Agencies): Assam nung rat hole mining maparen ajak anogo tenetnü tsüngda shibangtsütsü ta Assam DGP GP Singh-i ashi.

Deobarnü Dibrugarh nung security review senden ka amenba sülen pai iba osang metetdaktsü.

Assam Chief Minister-i Tinsukia district kübok Margherita, Ledo, aser Lekhapani tesemtem nung

ozüng alema nakmati atuba maparen azüoktsü tetuyuba agütsüogo ta GP Singh-isa ashi. "Iba tetuyuba sülen administrative ketdangsurtem, forest department personnel aser Coal India nungi teshimtet nübotem den senden ka amen. Idangji anogo tenet tsüngda nakmati atudak shibangtsütsü osangshiogo" ta DGP-isa shisem.

"Iba mapa ya tenzükogo aser yashi Northeast Coalfields

lease area nung ozüng alema nakmati atudak tesem ana meteta shibangtsüogo" ta paisa ashi.

"Tanep Umrangshu tesem ajunga survey süogo. Nakmati tasen atuba mapa kecha maliasü aser tesüiba nung tuteta aliba nakmati aputsü tetuyuba agütsüogo. Iba maparen ya anogo tenetnü tembangtsü" ta Assam DGP Singh-isa metetdaktsü.

Meghalaya sorkari Harijan Colony ken o angatetteptsü

Shillong, January 19, 2025

(Agencies): State sorkari Shillong kübok Them Iew Mawlong nung Harijan Colony nungi kibong 342 anientsü ken o angatetteptsü ta Meghalaya Deputy Chief Minister Prestone Tynsong-i ashi.

Harijan Colony relocation atema High-Level Committee

(HLC) nung Tynsong ya chairperson lir.

State sorkari Harijan Colony nung alirtem anientsü atema blueprint ka renemogo aser parnok nüngdakba peritsüsa tesem kati anientsü ta Tynsong-i ashi.

"Iba ken o ya yakta angatetteptsü imlar. State

sorkari Union Defense Ministry dang Iewmawlong petrol pump anasa defense ali amshitsü asüngdangogo" ta Meghalaya Deputy CM-isa ashi.

Ajisüaka defence land ya mengutetra state sorkari blueprint ka renema lir, ta Tynsong-isa shisem.

Assam STF-i Dhubri district nung Jihadi ka apu

Guwahati, January 19, 2025

(Agencies): Assam police nung Special Task Force (STF)-i Dhubri district nung Jihadi ta temulung melemi bilemer ka puogo.

Bilasipara nung apuba Jihadi ya Jaher Ali ta jangjaogo aser pa Guwahati-i anir ao.

Iba dak sendakba nung bushisüngdang ka tenzükogo.

Chief Minister Himanta Biswa Sarma-i New Year



osangbener senden nung jembidang sorkari arrtsülen Jihadi maparen anema takok ngua inyaka arudar ta ashi.

Iba ya National Investigation

Agency aser Intelligence Bureau den yaritepba ajanga inyakteter ta CM Sarma-i ashi.

"Onoki nisung 23 puogo aser prangpong-injang aika ngutetogo. Assam police-i arrtsülen iba lendong meteta dang lir" ta paisa ashi.

"Onoki NIA aser IB den yaritepa maparen inyaka arudar. Onoki Bengal aser Kerala nungi nisungtem puogo" ta CM Sarma-isa shisem.



Arunachal Pradesh nungi Gujarat kübok Jamnagar nung private zoo kati shidi bener aoba gari ka noksa nung angur. Reliance Industries Chairman Mukesh Ambani'er jabaso tanubosang Anant Ambani indang zoo Vantara-i shidi 33 tashi bener aoba ya January 19, 2025 anepdang Assam kübok Tinsukia district ajanga süidang metet. Environmental activist Jayanta Kr Das-i ashiba agi Gujarat registrations aliba animal ambulances nung Pollution Under Control Certificates (PUCC), insurance, aser fitness certificates dena nüngdakba kulikakettem maliasü. Anant Ambani-i Vantara ya Radhe Krishna Temple Elephant Welfare Trust aser Greens Zoological Rescue and Rehabilitation tsüngda amalitepa lapok.

Gaza ceasefire aser pua yua alir chiok tenzükogo

Gaza City, Aenjeti/January 19 (Agencies): Mapang talangka nungi yongya aliba Gaza ceasefire tezüngzüktep noklem mezüngbuba ghonda asem jungnüa menur tenzükogo, aser Hamas-i Deobar aonung tashinung Israel nunger pua alir nisung asem chioktsü.

Ceasefire ya anepdang 8:30 ako nung tenzüktsü liasü, saka Palestine nunger tepuokdak alirtem chioktsü melen Hamas-i pua alir chioktsü tenüngtem magütsü ta Israel-i ashi. Hamas-i technical mechi tenüng agütsüba menu ta ashi.

Ceasefire tenzüktsü mapang süyiba sülen Israel mitkari Gaza nung "terror targets" nung amakdang Palestine nunger nisung 19 tepset ta ashir.

Israel-i hostages tem tenüng anguba sülen ceasefire ya anüngdang 11:15 ako nungi tenzük. Hamas-i mezüng noklem nung chioktsüpur rongnung British-Israel aser Romanian-Israel senso dena lir ta ceasefire

atema tetsüngtai ia jembir Qatar-i ashi.

Hamas-i sangdong ka nung chioktsü aliba tetsür asem ya Romanian senso Romi Gonen (24), Doron Steinbrecher (31) aser arishi küm 28 tain Emily Damari, shiba British tsür la kisüng lir.

Israel sorkari tenüng tem mesangdong, saka hopta trok mezüng noklem ceasefire mapang Palestine nunger tepuokdak alir noklang aika den melenteptsü aliba Israel nunger pua alir 33 rongnung tetsürtem ya dena lir ta ashi.

Israel sepatem ya Gaza nung nisung kanga melema alidak nungi ainshitsü, tesem balala nung jenshia aliba Palestine nunger temi pei kidangi meyipa shilangdaksütsü melatsü aser anogoshi teyari oset bena aliba gari tulu noklang aika iba tesemi yoktsü.

Yimjung noklem tanabuba nung tanünga hostages tem chioktsü, Israel sepai ajunga ainshitsü, koba anogo 16 nü buba nung tenzüktsü.

Tasembuba aser tatembangba noklem nung

Gaza yanglushitsü - koba küm aika agitsü - aser tanünga hostages tasümgang meyiptsütsü.

Honibar aonung Israel Ato Kilonser Benjamin Netanyahu-i ceasefire koba südir süaka khen atema dang, aser raksara US teyari nung rara tenzüktsü Israel dak temeden lir ta ashi.

Hamas teloki October 7, 2023 nü Israel south tsütsü arütsü alema aita nisung 1,200 shi tepseter ano nisung 251 pua bener aoba sülen Israel-i iba telok samatsütsü nükjidong nung rara tenzük.

Iba sülen Gaza nung nisung 46,910 dak tema tepsetogo, ta Hamas meyong health ministry ajanga ashir. Yangji aliba nisung 2.3 million nungi timba pei ki yutsür tesem balala nung prokshia lir, tesem ajaklen ki o jen raksatsüogo aser chiyongtsü, totzü, mozü aser tejenokdak tesem maka tim atemer.

Tang tashi Hamas-i nisung 94 pua lir aser item rongnung 34 süogo ta amanger ta Israel-i ashir.

Election masü yimjung tongtibang: ASEAN

Kuala Lumpur, Aenjeti/January 19 (Agencies): Southeast Asian linüktemi Myanmar nung military sorkar dang, linük nung civil war tesashiba küma aoba mapang election agitsü asoshi sentong yanglubaji tongtibangba masü ta shia rara anentsü atema sensaksem tenzüksü mepeshia metetdaksüogo.

Association of Southeast Asian Nations (ASEAN) foreign minister temi Deobarnü Myanmar nung raratepa aliba teloktem dang raratep anentsü ayongzükba den Myanmar nungi lenir dang humanitarian teyari kecha tetsükdaksü makai agütsükdaksütsü shiogo, ta Malaysia indang foreign minister-i ashi.

"Myanmar mulung nung kechi ali aji Malaysia-i metetner," ta Mohamad Hasan-i Langkawi asetkong nung ministerial retreat ka sülen osangbenertem den sensaksemba mapang ashi.

Hasan-i ashiba agi, Myanmar tenüng nung senden nung adenba leniri sentepa aliba lokti dang taküm küm general election agitsü sentong aliba indang metetdaksü. Ajisüaka iba bloc yagi Myanmar sorkar nem election kecha magi tsüngda linük nung yimjung benokdaksüner, ta paisa

shisem. Myanmar nung military lenirtem formal ASEAN senden nung metendaksütsü atema tenokdangba agütsüba sülen senden nung Myanmar tenüng nung Ministry of Foreign Affairs nungi tekübokba jenjang nung aliba ketdangtsür kati shilem agia liasü.

"Onoki election nung ajak nem shilem agidaksütsüla ta shiogo. Election ya talenba kübok magitsüla aser stakeholder ajak nem shilem agidaksütsüla. Onoki parnok dang election ya onok asoshi tongtibangtiba onük masü ta shiogo. Onok asoshi tongtibangtibi azütokshi anendaksütsüba ya lir," ta pai ashi.

2021 küm tetenzüklen military sorkari Nobel laureate Aung San Suu Kyi-i aniba civilian sorkar atsüngtokba sülen Myanmar nung mepetmesü tenzük nüburtemi longkak ait tenzük aser mapang tatsüka dang lir prangbong hadir balala bener military sorkar anema nokdak tenzükba sülen parnoki linük nung tesem aika aziokogo.

Tesem aika nung kanga mejungi tamakok anguba den rongsenketzüng jenjang kanga mejungi kümer aliba aser political party kar nem tenokdangba agütsür liaka military sorkari taküm election

agitsü sentong yangludar, koba ken o asadangertemi ashiba agi, general tem nem maneni linük yimsüsdaksütsü atema tasa ka lir.

Malaysia ya taküm asoshi züngsem 10 agi kümteba iba telok mendenbuba lir aser parnoki Myanmar nung mepetmesü adoker aliba achaayangtsü atema special envoy ama taoba mapang diplomat Othman Hashim shimba sangdongogo. United Nations-i ashiba agi, Myanmar nung humanitarian teyari kanga nüngdaka lir, kong nisung million 20 shi teyari nüngdaka lir.

Mohamad-i ashiba agi, Hashim-i yakta Myanmar semdanga telok ajak dang ASEAN-i yimjung asoshi onük pongu benoker aliba benoktsü asoshi parnok ajungmesotsü merangtsü. ASEAN-i yimjung asoshi onük pongu ya coup sülen ita ishika lir sangdong saka tang tashi mapa küma inyaksangshia mali.

Hasan-isa, senden nung China den toktepa mapang ka nung taruba US tir Donald Trump-i tanabuba term tir mapa abentsü renemba mapang iba ajanga linüktem dak kechi koda kongshitsü ali iba indang sensaksemba liasü, ta ashi.

Mulungnen O



Ojala **Asür Wt. Zulumenla**, temang manemi alidang nungi akümlima teti atema toktsür anisüngzükba mapang, ozü kibong aser kinungertem den mangyim jashi aser mulungkho kwinakati lemsatepogo ajak dang kangasa pelar.

Nenek temeim, ariabilem den rongsen, nübu, shisatsü aser sarasadem ajanga ozü mulungjang taret pungpadakja süngzükdaksür.

Meimchir asoshi tammangtiba anogo mapang nung teyari balala ajanga yaritepa nungiter kija kibong aser loklitem dang onoki kangasa pelaba lemsateper:

1. Mopungchuket Baptist Arogo.
2. Dimapur Ao Baptist Arogo.
3. Mopungchuket Senso Telungjem, Dimapur.
4. District Hospital, Dimapur nung aliba Doctors, Nurses aser Medical Fellowship.
5. Ojala tatembang anisüngzüksü Dimapur aser Kohima nungi la meina taso yimkong tashi arur tembar, tinur aser kinungertem.
6. Kinunger Baptist Arogo.
7. Chami Baptist Arogo.
8. Naga Christian Fellowship, Dehradun.
9. United Women's Welfare Society, Lower Lerie, Kohima.
10. Konge Semchir, Mopungchuket.
11. Zulusang Semchir Fund.
12. Aturatsür Telok, Mopungchuket.
13. Ozükumtsür Entiba, Mopungchuket.
14. Takozüng Semchir Telungjem:
 - Dimapur (Tetsür and Tebur)
 - Kohima
 - Mopungchuket (Tetsür and Tebur)
15. Mopungchket HWC, Medical Staff.
16. Directorate of Municipal Affairs Kohima.

Item dak alaka mezülusemi alir shirnokisa ozü den mapang ajak nung nungita yariogo ajak dang kangasa pelar. Asen taochisang Tsüngremi nenok ajak maneni moajangma.

**Temeim nung ajak dang mulungbensaa pelar
Kinungbu, Chirnur,
Apanger, Tetsütamo aser Semchirtem**

Yoon bhukumer tem Court kati nungboka ai

Seoul, Aenjeti/January 19 (Agencies): South Korea nung court kati Tir Yoon Suk-yeol ano anogo 20 tashi pua ayutsü mapang atsülangtsü aser iba yongji pa bhukumer nisung noklang aika court telungi nungboka aita osettsüset raksatsü.

Deobarnep 3:00 ako meta court ajanga iba telemteba sangdonger mapang tatsüka tsüngta pa bhukumer tem iba court sünga adenshia riot police dang timba akum.

December 3 nü martial law sangdongba dak sendakba nung sorkar anema inyak ta tai tonglokja Yoon ya taoba hopta South Korea tir teinyakdak apur mezüngbuba akum.

Video footage nunga longkak aiter temi court kima police tantüker alidak fire ex-

tinguishers pokdakja liasü aser court telungi nungboka ia office indang osettsüset raksatsü.

Yoon aser pa indang okatsür temi okadak Honibarnü nokdak aser pa chioktsü indang shia liasü. Ajisüaka pa pua ayuba ya ano atsülangtsü akok, aser ano maneni ita aika atsülangtsü.

Pai December 3 nü martial law sangdongba ajanga linük nung yimtenren tsütsü mepetmesü tulutiba adok.

Corruption Investigation Office for High-Ranking Officials ajanga police aser mitkar den lungjemer iba ken o bushisüngdang aser parnoki pa anogo 20 tashi pua yutetsü, aser iba mapang parnoki ken o ya public prosecutors tem dangi yoktsü.

Axelsen, An Se-young nati India Open kokogo



Aenjeti/January 19, 2025

(Agencies): Viktor Axelsen aser An Se-young nati Deobarnü New Delhi nung India Open Super 750 badminton tournament tebur aser tetsür kija asaya final kokogo.

World championship anaben tashi koker alisang Axelsen, shibai 2017 aser 2019 kuma India Open kokogo, pai final

asaya nung asaya amokbanger asaya-a Hong Kong nung aser Lee Cheuk Yiu 21-16, 21-8 agi straight games nung koka liasü.

Iba asayamung akokba ya Axelsen atema kanga tongtibang asütsü, kechiyong pa Olympics sülen yiruba aser junga masayatetba ajanga tetsükdaktsü kar ajangshia

aruogo. Pai iba asayamung nung trokben asayba mapang tasembuba title abenba atema pelaba lemsatapa liasü.

Tetsür kija asaya final nung South Korea tsür An Se-young-i kanga junga asaya-a Thailand tsür Pornpawee Chochuwong 21-12, 21-9 agi koka India Open tanabuba kokogo. Lai taoba kuma final tonga asayaogo.

Tebur tarep asaya final nung Malaysia nung tarep Goh Sze Fei aser Nur Izzuddin nati 21-15, 13-21, 21-16 agi South Korea nung tarep Kim Won Ho aser Seo Seung Jae na koka liasü.

Tetsür tarep asaya final nung Japan tsür Arisa Igarashi aser Ayako Sakuramoto nati South Korea tsür Kim Hye Jang aser Kong Hee Young na 21-15, 21-13 agi kokogo.

Kasa mapang nung tarep temeyoktep asaya final nung China nung tarep Jiang Zhen Bang aser Wei Ya Xin nati 21-18, 21-17 agi France nung tarep Thom Gicquel aser Delphine Delrue na koka liasü.

Chennaiyin FC-i Pritam alizükogo

Aenjeti/January 19, 2025

(Agencies): Indian Super League club Chennaiyin FC-i parnok defence line akangshitsü atema Deobarnü India nung international asayar Pritam Kotal Kerala Blasters FC nungi alizükogo.

Arishi küm 31 tain asayar yagi küm ana ser tesadang atema tenangzüktepba ka yangluogo.

Kerala Blasters FC nungi küm ka ser tesadang asayaba sülen Kotal ya tang Chennaiyin FC nung denogo. Pa Mohun Bagan nungia asayaogo aser iba mapang ISL title ka benogo aser taoba mapang Pune FC nungia asaya liasü.

"Ni Chennaiyin FC kibong nung densemba atema kanga pelar. Coach-i pa indang team nung ni kanga nungdakba rasa shiogo, anungji maongka anguba mapang ni kecha matidaki liasü," ta Kotal-i ashi.

"Iba ya team kanga tajung ka lir aser kanga jung asayar. Kü nükjidongji tang nungi tenzüker asayar ajak koka playoffs-i aitsü atema asütsü," ta defender yagi ashi.

"Coach Coyle idaki küm ishikabo inyaker aser pai league aser India nung asayatem meteta lir. Asayartemia pa meteta lir aser akümtsübur. Ni asayaba moapu nung ni akokba tashi tajungtiba asayaner aser ni pa kübok asayatsü kanga pela bilemer," Kotal-i ashi.

Kotal mezüngbuba international jenjang nung senior team nungi 2015 küm asaya aser iba sülen pa India team nung defence asayar tongtibang ka kümogo.

Kotal, shiba nem 2015 küm AIFF Emerging Player of the Year naroküm agüja liasü, pai 2016 küm India team-i South Asian Football Federation Championship akokba mapang kanga tongtibang shilem agiogo aser pa ya 2018 Intercontinental Cup aser 2019 AFC Asian Cup asayaba team nunga densema liasü.

CFC head coach Owen Coyle-i ashiba agi, "club-i Pritam anir aruba atema kanga pelar. Pa ya temaba jenjang nung asayaba asayar ka aser India tenüng nungi 50 ben dak tema asayaogo.

"Pa league akokba team nung densema liasü aser pa dak football asayatsüba sempet den lenir asütsü sempet tajung keta lir," ta Brit-i ashi.

"Pa tejangraba tulu aliba asayar ka lir. Ni pa den mapang talangka jembioogo aser pai club-i aruner. Pai lanur asayatem nem teyari agütsüner aser pa asayar koda tajung aji sayutsü," ta paisa shisem. "Pa ya club atema kanga tapet. Pa yimya yimpong tajung, lenir ka aser pai asayamung tanabuba shilem nung team nung teyari agütsütetsü," ta Coyle-i ashi.

Djokovic aser Alcaraz na quarter asayatsü



Aenjeti/January 19, 2025

(Agencies): Serbia nung nungtugu tennis asayar Novak Djokovic-i Deobarnü round of 16 nung Jiri Lehecka straight sets nung akokba sülen quarterfinal-i iogo.

Australia Open 10 ben koker aliba asayar yagi iba asaya nung Czech nung asayar Lehecka ya 6-3, 6-4, 7-6(4) agi koka taküm asoshi mezüngbuba Grand Slam nung quarter tongtetogo.

Iba asaya akokba sülen Djokovic quarterfinal nung Spain nung asayar Carlos Alcaraz den asayatsü.

Djokovic, shiba Australian Open 11 buba aser Grand Slam 25 buba akoktsü atema meranga asayaba mapang ka lir, pa asayamung asayayonga aoba mapang tajungba tajungba asaya odar aser pai Alcaraz

kokra pa nükjidong atongtsü asoshi tetsükdaktsü tulu ka ajangtetba asütsü.

Alcaraz, shiba Grand Slam pezüprongla akokba asayar tanobusang akümtsü merangba mapang ka lir, pai round of 16 nung Jack Draper 7-5, 6-1 agi koka liasü. Draper ya yiruba ajanga asaya tembanga masayateti liasü.

Kasa asayamung tebur kija asaya nungsa Alexander Zverev-i Deobarnü France nung asayar Ugo Humbert akokba sülen Tommy Paul den quarter-final asayatsü jangjaogo.

Second seed asayar yagi asaya tetenzük nungi kanga junga asaya aser John Cain Arena nung iba asaya ya 6-1, 2-6, 6-3, 6-2 agi koka liasü.

Pa semifinal nung jenjang ka asoshi 12 seed Paul den

asayatsü shibai Spain nung asayar Alejandro Davidovich Fokina kokogo.

Zverev aser Paul na anaben asayar lir, ajisüaka 2022 küm Indian Wells sülen khen danga asaya mali. Asaya anaprongla ya Paul-i koker lir.

Round of 16 asaya nung Paul-i 6-1, 6-1, 6-1 agi Alejandro Davidovich Fokina ayong ayonga koka liasü.

Tetsür kija asaya nung Spain tsür Paula Badosa-i round pezübuba nung Serbia tsür Olga Danilovic koka quarterfinal-i iogo, kong la Coco Gauff den asayatsü, shibai Deobarnü Belinda Bencic tsükdaktsüogo.

Badosa-i asaya ya 6-1, 7-6(2) agi straight sets nung akok aser kasa mapang nung Gauff-i 5-7, 6-2, 6-1 agi Bencic madak takok ngua liasü.

Shakib apusü atema warrant agütsüogo

Aenjeti/January 19, 2025

(Agencies): Dhaka nung okadak kati Shakib Al Hasan apusü atema arrest warrant agütsüogo. Bank cheque ana bounce asüba dak sendakba nung Bangladesh nung all-rounder aser taoba Parliament züngsem ya apusü tetuyuba agütsüogo.

Iba warrant ya Additional Chief Metropolitan Magistrate Ziadur Rahman-i agütsü, shiba police dang iba tetuyuba benoka inyakba indang osang ka March 24 nü tashi nungbo agütsütsü tetuyuba agütsüogo. International Finance Investment and Commerce (IFIC) Bank-i benokba ken o dak sendakba nung okadak nokdaktsü atema tetuyuba agütsüba sülen Shakib-i manidakba ajanga iba ken o ya adoka liasü.

Bank-i taoba mapang cheque bounce asüba indang legal notice ka agütsü aser December 24 nü Shakib aser pa indang company Shakib Al Hasan Agro Farm nungi ketdangsur asem anema ken o ka benoka liasü.

Shakib, shiba dang United States nung lidar, pa Bangladesh-i meyipa marui lir,

kechiyong taoba PM Sheikh Hasina taoba küm mapa nungi anentsüba sülen linük mesüngjemeti aliba ajanga timtem ajangshitsü akok ta bilemer.

Pa ya 2024 küm January ita 7 nü election agiba mapang Awami League ticket nungi toktepba Parliament züngsem kuma liasü.

Shakib dak alak ano okdaki agro farm managing director Gazi Shahagir Hossain apusü atema arrest warrant agütsüogo. Pa jaokba dak sendakba nung telangzuba magütsüba atema iba tetuyuba agütsüogo. Maneni farm ketdangsur anati okadak bendanga agütsüogo aser ken o angadanga sülen bail nung chiokogo.

Shakib Al Hasan ya Bangladesh nung rongnungi cricketer asayar tajungtiba ta züngshir aser pa tatemsa taoba küm Kanpur nung India den asaya liasü.

Pa tang action majungba ajanga format ajak nung ball maontsü atema tenokdanga agütsür lir. Agro farm ya Shakib-i southwestern Satkhira nung 2016 küm amenok, saka 2021 küm nungi inyaksangshi masür.

BILEMDANGANG

"Temeim agi meitmpang mulungsentsü sungjemdaktsür."